

國史列傳

滿漢大臣列傳

卷七十三

田鳳儀

周興岱

鄒炳泰

周廷棟

錢樾

平恕

汪日章

許兆椿

張廷彥

何元卿

田鳳儀河南安陽人乾隆三十六年進士分刑部學習主事四十五年補江西司主事四十八年遷湖廣司員外郎是年京察一等授廣西思恩府知府尋攝桂林府事五十一年巡撫孫永清以鳳儀廉明公正熟練刑名保舉堪勝道員引見陳請父年八旬奉

旨發往湖北以五百里外道員用補安襄鄖道五十四年署按察使五十七年兵部議裁站船鳳儀以爲楚省襟帶江湖水程迢遞銅運往來實需利濟每年糧運赴淮例有撥運前經總督吳達善酌議裁減所存僅四十隻此外有黃陂縣之汨口站黃梅縣之清江鎮或因驛遞衝途中隔大江或因山路崎嶇本無郵站皆非徒事虛糜未可遽裁

從之五十八年遷浙江按察使五十九年遷布政使時會議定海縣五奎山爲海船停泊扼要之區添設礮臺下部議行六十年四月奉

上諭田鳳儀人尙結實著調補福建布政使五月鳳儀奏請查閩省各屬倉庫虧缺得

旨一切實力妥爲之八月與署總督長麟巡撫魁倫酌議改造營船向來均係各省捐貲茲值查辦虧缺之時既不能再令不肖州縣藉資口實而勦捕洋匪勢難停止請支借庫項以供急需將浙省繕船等酌爲改造亦不致多費帑項旋經議行十一月鳳儀審辦屬員虧缺倉庫正雜各項分賠設立清查局有因前任虧缺扣留後任代爲彌補以致後任虧缺者仍歸各任以昭平允至缺雜欸以及因公應捐等項究與挪侵間止應責令補還以五十六年清查以前爲原虧五十六年清查以後爲續虧得

旨議行嘉慶元年請以臺灣蠲免供粟應分三年輪免除本年留給臺灣澎湖二處兵米外以其餘存酌徵供粟運給內地合

支餉精不敷惟上年漳泉被災曾于浙江動碾倉穀採買米石以備糶濟嗣因春收豐稔停糶之米尙餘存貯堪以支撥兵精從之二年五月奉

上諭福建巡撫員缺著鳳儀補授尋以該省倉庫虧缺未完應查明追繳

命鳳儀一手經理督同司道詳查妥辦閏六月以分別繳賠所議未公有

旨申飭七月丁父安世憂督臣奏鳳儀哀毀太過精神不濟離任回籍九月卒于浙江杭州府子寶裔六品廕生

周興岱四川涪州人父煌歷官兵部尙書諡文恭自有傳興岱成乾隆三十六年進士改庶吉士三十七年散館授編修四十二年充順天鄉試同考官四十七年以辦理四庫全書議敘奉旨遇有應陞缺出與俸深人員輪班分次帶領引

見四十八年充山東鄉試副考官旋丁父憂服闋補原官五十年三年擢右贊善五十四年充陝西鄉試副考官是年累遷至侍講學士五十五年四月奉

命提督廣東學政五十六年超遷內閣學士兼禮部侍郎仍留學政之任因校文津閣書籍有誤交部查議降一級留任五十八年還京充會試知貢舉武會試總裁五十九年充鄉試正考官六十年授禮部右侍郎充順天鄉試監臨武會試總裁旋奉旨在南書房行走嘉慶二年轉左侍郎三年復充順天鄉試監臨四年正月調吏部右侍郎二月

命兼管樂部事務三月充經筵講官十月轉左侍郎奉

命祭告川陝嶽瀆五年正月調戶部右侍郎時在道奉

諭曰自川楚教匪滋事以來所過地方焚燒搶掠迫脅萬狀民人不得已而從賊經朕節次降旨令領兵大員剴切曉諭如賊匪中果能有歸命投誠者仍係朕之良民令地方官妥爲收卹現在戶部侍郎周興岱赴川陝祭告嶽瀆著于所過川陝曾經被賊處所將此旨宣布謄黃並面告地方官遵照妥辦以副朕矜恤愚民脅從罔治至意四月興岱奏言臣行抵廣元縣詢問川北鎮總兵朱射斗在高院場失利時總督魁倫未同前進並無接應至潼河最關緊要魁倫復防範不嚴致賊匪于三月十

八日夜竄過太和鎮數萬生靈慘遭焚殺臣將次省城于漢州
新都一帶沿途訪聞大略相同再臣于初五日行抵梓潼適賊
匪在該縣境內滋擾臣目覩民人遷徙紛紛並有被賊所傷者
臣因前途阻塞在該縣暫停二日督率嚴防百姓始行安住初
七日臣即行前進親見各處團寨頗形惶惑臣乘騎竟日行一
百八十里于馬上逐處詢問居民普加慰諭俾無驚恐至蒙
垂問川省帶兵各員何人奮勇畏葸之處皆云川省勦辦賊匪
自德楞泰移師到來實奮勇出力且能于臨陣時宣布
聖主如天之德是以新被裹脅者紛紛投出無不感戴
皇仁但一人之力究難處處兼顧應請

勅下督兵大臣同心協力以期迅奏膚功奏入

諭曰昨據勒保奏審辦魁倫一案已添派周興岱一同會審今
據周興岱查奏各情節看來魁倫種種罪狀竟無一字虛假著
周興岱勒保再將以上情節向魁倫逐加詰訊一面按律定擬
具奏一面押解成都監禁候旨遵行旋經勒保會同周興岱審
明覆奏

上命交王大臣會議魁倫罪名興岱旋即回京六月兼管錢法
堂事務六年充鄉試正考官七年正月以典試江西時有收受
衣裘銀兩並出告示等事

命巡撫張誠基詳查得實

諭曰周興岱係二品大員奉命典試自應潔己奉公乃于該省
餽送銀兩輒行收受並告冬令未帶冬衣致撫藩等添送衣裘
殊屬卑鄙著退出南書房仍交部嚴加議處議上

命降爲四品京堂二月補授翰林院侍讀學士八年閏二月大
考屆期自陳年老懇請休致奉

旨勒令休致三月

諭曰周興岱自請休致是以降旨勒休咎實由于自取但念伊
父周煌曾任尙書房師傅周興岱前在南書房行走稍有筆墨
微勞著加恩賞給編修准其在館効力九年二月以恭校

實錄內抬寫字訛降三級留任十年擢侍讀十一年擢內閣學
士兼禮部侍郎十二年以

實錄全書告竣

恩予二等議敘十二月授兵部右侍郎十三年充會試知貢舉擢都察院左都御史十四年充武會試總裁是年卒子廷授二品廕生現任工部員外郎

鄒炳泰江蘇無錫人乾隆三十七年進士改庶吉士四十年散館授編修旋充四庫全書纂修官四十三年因纂書出力

命優敘四十五年充文淵閣校理四十六年遷國子監司業五十二年擢祭酒五十三年充浙江鄉試正考官五十四年七月授詹事府少詹事八月提督山東學政十二月遷詹事五十五年擢內閣學士兼禮部侍郎仍留學政任五十六年八月丁父憂五十八年十一月服闋六十年二月補原官八月充順天鄉試副考官尋提督江西學政嘉慶二年正月丁母憂四年四月服闋五月補原官旋授禮部右侍郎九月調倉場侍郎五年三月劾坐糧廳顏培天嗜酒任性請撤回交部議處

從之六年二月京察

諭曰鄒炳泰剔除積弊整頓漕務著交部議敘五月裕豐倉不戒于火炳泰以未能先事防範自請議處

上以炳泰駐筭距倉較遠一聞稟報卽馳赴該處查看尙無不合

免之七月都統明安奏二月分西四旗應放米石遲至數月之久毫無聞見

命交部嚴加議處尋議降二級調用

恩准抵銷會侍郎達慶奏報軍船回空日期炳泰未經聯銜復單銜具奏各幫虧短米石數目

上命侍郎和寧祖之望馳赴通州查辦嗣以查明未經會商奏入

諭曰鄒炳泰于二進軍船掛欠既經奉旨將餘米撥補三進軍船糧事同一例焉有歧視之理而鄒炳泰因與達慶意見不和輒稱豫防旗丁等年年積壓雖似因公起見實不免偏執使氣鄒炳泰著交部議處尋議降一級留任九年八月御史五誠額奏請各倉監督輪流率役在倉住宿

勅下倉場議奏經炳泰議以倉廩重地若令倉役時常出入或與在外匪徒勾串偷竊且嚴冬燒炕火燭可虞請仍于附近倉

門官房居住輪班稽查

上是之十年二月擢都察院左都御史五月遷兵部尙書六月兼署工部尙書九月管理戶部三庫事務十二月充經筵講官十一年二月

上御經筵炳泰誤站班處次未請處分

命交部加等議處尋議罰俸六年九月兼順天府府尹事十一月

命紫禁城騎馬十二年正月調吏部尙書十三年三月充會試正考官十四年正月加太子少保銜四月充殿試讀卷官六月已革倉書高添鳳盜領米石案發

上以炳泰在任最久于少收多放情弊全無覺察命革去宮銜降爲二品頂戴仍帶革職留任尋以

萬壽慶典

賞還一品頂戴十五年十月炳泰七十生辰

御書卿雲錫祉匾額賜之十六年正月炳泰以足疾請開缺諭令安心調養不必限以時日復

命御醫診視三月署戶部尙書四月充殿試讀卷官復充朝考閱卷官五月協辦大學士仍兼吏部尙書六月

賞復太子少保銜九月炳泰因吏部司員扣缺錯誤廻護堅執將辦理緣由陳奏

上是之十八年八月充順天鄉試正考官會降調知縣傅士奎及已革司獄夏本榮呈請捐復炳泰前後准駁與署任侍郎初彭齡意見不同經初彭齡奏入

上命大學士勒保等詳覈具奏旋經查明兩案覆奏均應議准諭曰鄒炳泰身任尙書遇有呈請捐復者應准應駁自當準情覆議乃于傅士奎一案則已駁復准旋又改駁于夏本榮一案則已准復駁茫無定見著交都察院議處尋議降二級留任又兵部主事姚瑩在昌平州八仙莊被劫

上以該處距京城數十里爲官員商賈往來孔道盜匪膽敢糾衆邀劫實由地方官聞葺所致鄒炳泰僅將專管上司參奏亦未自請處分竟視爲尋常盜案照例辦理殊覺懈弛

諭無庸管理府尹事務九月以逆匪林清黨羽多係直隸固安

及黃村一帶人

諫曰鄒炳泰在順天府尹任內平日漫無查察以致養癰貽患著以中允贊善降補尋休致回籍二十五年正月卒

周廷棟初名元良順天大興人由乾隆三十七年進士以刑部主事用四十六年補奉天司主事四十八年陞廣西司員外郎五十年陞浙江司郎中兼總辦秋審五十一年改福建道監察御史五十三年轉掌雲南道監察御史五十八年陞兵科給事中五十九年轉刑科掌印給事中嘉慶四年疏請停大員罰繳養廉之例以肅官方而杜科派得

旨下部議行六年

命巡視天津漕務七年擢光祿寺少卿軍機大臣傳

旨元良名未協著自行酌改尋更名廷棟補通政司副使八年三月陞太僕寺卿七月

命同署侍郎那彥承赴永平讞樂亭民人韓義琦控命案及宗室西靈額控爭地畝案得實奏

聞九年授大理寺卿八月陞左副都御史

簡四川學政時川省軍務告竣閭閻復業廷棟奏言體察時宜亟須整頓四事一裁汰冗役以省擾害一清理詞訟以免拖累一嚴治奸匪以安良善一舉劾州縣以示激揚從前軍務旁午不得不多設差役地方控案勢難依限完結義民鄉勇踴躍從公者因其中多劣監豪衿把持衙門者亦不少州縣賢否亦未暇詳細甄別均宜一一清釐以符政體

上是之十年擢刑部右侍郎十一年轉左侍郎六月以研鞫迷拐案稱

旨加恩紀錄三次十二年正月授都察院左都御史二月

命同侍郎廣興馳往河南查辦糧道係長庚被控貪私欸蹟及嵩縣令王光治被控虧欠社倉浮收錢糧二案旋赴山東讞獄經步軍統領及都察院奏東省民人京控共十餘案先後咨交廷棟等鞫實問擬如律報

聞又李臨控李瀚霸產不分居喪聽戲一案廷棟等訊臨瀚父祖已經析產本無不勻李臨以現任通判捏病開缺覲產結訟李瀚以六品職銜制中觀劇均請革職解交刑部質訊以免再

滋訟端

諭曰此案既經周廷棟等提訊明確各予褫革均屬情真罪當不必再交刑部以省拖累九月事竣回京十月疏言健訟積弊請詳核情詞實係冤抑難伸及官吏飢法有據者方准奏

聞外餘咨回本省審辦按期行催開單彙奏其有主使挑唆及挺身包攬挾嫌誣陷逞刁翻控等情通行飭禁以杜訟風又言大宛兩縣童試冒考甚多請查辦以肅學政並照例清查冒籍諸生已中鄉會試及現任職官勒限改歸原籍均得

旨允行十三年十二月廣興以奉差劣蹟逮問

諭曰周廷棟與廣興同赴東省審案閱時半年之久于伊需索受賍各款竟毫無聞見近日屢經召見垂詢周廷棟不但力言其並無騷擾營私情事並以廣興辦事才具明敏竟似外間物議冒加以不是之名若謂伊實未聞知則係形同木偶倘竟知而不言則係有心徇飾且伊在東省供應亦需日費十餘兩咎有應得周廷棟著交部嚴加議處議上

諭曰朝廷風憲大臣專司參劾遇有營私飢法本應隨時奏陳

方爲盡職前此周廷棟與廣興同赴山東審案于廣興需索騷擾之處自必確有見聞乃覆命後竟無一字提及近因廣興緣事革職仍不直陳並以廣興才具明敏支吾掩飾昨據吉倫訪查具奏有周全天下事廣聚世間財之謠周廷棟雖未隨同婪索而庸懦無能卽此可見復令軍機大臣傳詢伊亦稱曾聞此語並廣興挑斥供應挖池唱曲等事伊亦有所知何以經朕詢問尙不據實奏聞是其瞻徇友誼而事上轉不以誠周廷棟總司風紀尤不應出此部議降四級調用固屬照例辦理但周廷棟人本平庸年亦衰邁且又扶同隱飾豈可再邀錄用周廷棟著賞給五品頂戴卽予休致十四年正月

諭曰據山東查明覆奏廣興審辦李瀚一案卽得銀至數萬兩之多周廷棟于廣興所得賍欸竟毫無見聞該省供應廣興極其繁華周廷棟照常預備伊不卽加挑斥寧不疑及廣興之任性作威爲婪索地步且于朕詢問時猶以廣興尙屬敢言廣興盜弄威福恣其慾壑奇貪奇酷品行卑汙獲罪在此朕豈因廣興敢言加之罪戾乎是其庸懦無能奏對又復顛倒失實本應

發往新疆姑念其年已衰邁免其遠戍但周廷棟如此辜恩亦何顏再膺章服之榮著革去五品頂戴永不敘用十五年二月故

錢樾浙江嘉善人乾隆三十七年進士改庶吉士四十四年散館授編修四十五年充陝西鄉試正考官四十八年授四川學政五十二年尙書房行走五十四年三月以曠值部議革職得旨改爲革職留任八年無過方准開復尋改四年開復給半俸六月充江西鄉試副考官六十年二月京察一等擢右贊善六月充江西鄉試副考官九月轉右贊善嘉慶元年二月授廣西學政洊陞左庶子二年遷侍講學士三年五月轉侍讀學士十二月擢少詹事四年正月差旋仍在尙書房行走二月遷詹事尋授內閣學士三月陞禮部右侍郎五月轉左侍郎七月授江蘇學政先是吳縣知縣甄補庭以錢債細事擅責生員吳三新諸生不服喧訴同知李焜用刑酷訊波累無辜學政平恕曲徇所請斥革生員二十五人

上聞之解平恕任

命樾馳赴蘇州先復諸生衣頂樾將首先滋事之馬照等三人並予開復

上飭之下部議處五月調吏部右侍郎六月轉左侍郎回京調戶部右侍郎兼管錢法堂事務仍兼署吏部左侍郎八年調吏部右侍郎九年失察書吏舞弊將告病治中趙曰灋虛選運同命革去侍郎交都察院議處旋降補內閣學士越數日樾復陳奏趙曰灋告病因科抄尙未到部不曾開缺其虛選運同本循照舊例辦理至書吏撞騙係經承轉之稿工貼寫堂司各官均不知其名

上以其嘵嘵置辯強詞奪理下都察院嚴議尋議革職

上念樾向在內廷行走有年尙屬勤慎加恩賞編修十年四月擢鴻臚寺少卿六月授山東學政十二年回京遷大理寺少卿命仍在尙書房行走十三年補內閣學士尋丁母憂歸服闋因疾陳請給假

命俟病痊時來京另候擢用十九年入覲具陳病體不能供職狀